

**AWIG – AWIG
DESA ADAT NGIS**



**KECAMATAN MANGGIS
KABUPATEN KARANGASEM
PROVINSI BALI**

MURDHA – CITTA

Om Swastyastu, Om Awighamastu Nama Sidham””

Putusing paseban krama Desa Adat Ngis gumawe Awig – awig Desa Adat maka sepat siku – siku pameneh, wastu kasidan prayojanan mami kabeh prasama angidep mwah amagehaken kadi linging awig – awig puniki.

DAGING LAN ERTINYASA DESA ADAT NGIS

1. Warna Kuning artin ipun kerahajengan.
2. Candi tumpang lima artin ipun panutan hidup medasar Pancasila
3. Padi makueh seket lima artin ipun akeh Krama Desane sane ngamong ayah ngarep skeet lima diri.
4. Kapas makueh sia badih artin ipun Dewata Nawa Sanga minakadi saksi ring sajeroning desa adat.
5. Cakra merai patpat artin ipun symbol Prajuru Desa Adat Ngis akueh ipun petang diri sane karemba olih krama desa skeet lima tur kesaksiang antuk Dewata Nawa Sanga.
6. Danganan utawi keris artin ipun pangubaktine ring sajeroning warga sami, marep sor artin ipun mewastu sapasira ugi piwal ring awig miwah paswara desa.
7. Pemalet makueh tigang paletan nyihnyang Tri Hita Karana
8. Masebeh antuk pita putih mekadi pepusuan nyihnyang sekancan pemargin hidupe kedasarin antuk kesucian.
9. Kalih iket padi lan kapas nyihnyang Desa Adat Ngis kesanggra olih kalih banjar, inggih punika Banjar Kajanan lan Banjar Kelodan.

Pamiteges Desa Adat Ngis :

“JAGADHITA PRAJA DHARMA CAKRA”

Artin ipun : Kelanduhan Krama Desa utawi pangemong jagat kepanggih medasar antuk paider dharma.

KETATWANING DESA ADAT NGIS

Sedurung warsa Icaka 1068 Desa Ngis kantun merupa alas sane merupa ngebetin. Punika ngawanang kirang rangkung Warsa Icaka 1068 wenten runtuh wacana ida ring Gelgel nitah dane mapesengan I Made Pasek Mas kewarih antuk Ki Pasek Agung Gelgel mangda ngerereh pagenanahan.

Sangkaning titah Dalem raris ngawanang I Made Pasek Mas panugraha ring Dalem jaga nilarin Panegara Sweca Pura lagi jumujug ngaler kanginang kairing antuk petang dasa diri. Nenten suwe ring margi ten ugi rauh ring desa Pekarangan kalih ngerauhang tetujon peruanan danene saha pengiring gumana sangkaning petitah Dalem mangda ja ngerereh pagenanahan.

Ring sampune awengi masangidan ring I Pasek Pekarangan kala irika raris kanikain I Made Mas mangde ngerereh pagenanahan jumujug kaler. Nenten doh pemarginane dane raris manggihin kali utawi tukad,kalih wit-witan sane kasinanggeh Sembung, punika ngawanang panegahan punika kawastanin Tukad Sembung. Saking irika raris dane malih ngalimbakang pemargi,sayan ngalerang wau raris kecingakin alas sane dahat rengka utawi alas nges. Melarapan saking bawos nges punika wetu raris panganika saking alas nges dados Ngis rauh sadinaning mangkin.

Sesampune dane kalih kaluwarga majenekan ajebos kerarisang raris pemarginane dane ngrabas kawentenan alas punika nenten ngetangin panes wiadin dingin. Dwining Sanghyang Surya sampaun bajeg,sakulawarga sami merasa kasatan raris I Made Pasek Mas ngenikain para pengiring sinalih tunggil mangda ngerereh toya ngemanggihin toya eresan sane ening, punika raris katunas tur katur dane I Made Pasek Mas miwah ring para kaluwarga sami.

Punika awanan ring wewidangan toya eresan sane kapanggih kewastanin wewidangan Yeh Inem rauh mangkin. Lintang kehulu wenten taler kepanggih genah pamedaling toya sane siwah katampenin kulawarga ne sami kepanggih ring tengahin sumur, mawinan wewengkon wewidanganpunika kewastanin Sumuh rauh mangkin. Saking sumur punika munggah raris kaluwarga sami nuju wetan ngantos kepanggih ring wewatesan Desa Tenganan.

Saking watesing Desa Tenganan, marginne matetujon raris mangulon ring gegiring gunung wenten raris kepanggih Sila Ngandang tur keanggen wewatesan mantuke ring Desa Macang kala irika taler pemarginne ngelantur mengulon kepanggih taler Sila Ageng Ngadeg,sane keanggen waneng mantuke ring Desa Sibetan. Nah ring pinggiring watu ageng punika kaluwarga sami majenekan ajebos. Sangkaning paswecan Ida Sang Hyang Widhi Wasa, ikaluwarga sami nyihnyang dewek keluen melarapan sangkaning pratyaksa I Made Pasek Mas kepanggih raris pala bungkah sane kasinanggeh biaung utawi ubi biaung.

Risampun raris katunaspala bungkah punika ikaluwarga sami tan ugi kaluen punika ical, pejangkepan sangkaning sih Ida Sang Hyang Widhi Wasa wawanang irika keadegang pelinggih sane kewastanin Pura Biaung. Nah risampun raris kulawarga sami polih pewarah warah saking I Made Pasek Mas pemarginne ngelanturang jumujug ring gegiring girijanten sampaun kepanggih ring wewidangan sane kekardi, kala irika taler I Made Pasek Mas kalih kaluwarga sami gargita ledang picayune, tur kelanturin antuk bebaos sekadi untal-untal utawi sumbar nyihnyang panikan

Dalem sampun sida antuka ngardinin ring ikulawarga sama awanan gunung punika kawastanin gunung Tumpalan.

Sehananing pemargi sampun kesida maka tungtung picayune keadegang raris palinggih sane kewastanin Pucak Sari. Peyutraan bebaos saking alas Nges rikala punika taler kenikayang dados Ngis, taler gunung punika keanggen wewatesan ring Desa Selumbung. Nanging durung merasa taler waneh ring pemargi punika ngawanang dane kalih ikaluwarga ngerarisang pemargin nuju Kidul sapunika taler rikenjekan perampagan taru-taru alas wenten sinalih tunggil taru sane ngwisanin awinan genahne punika kewastanin wewidangan Tuba keanggen wewanengan mantuke ring Desa Adat sengkidu ngantos mangkin.

Sangkaning wewidangan punika wawu rarис maicayang pemargi kalih sampun taler keicenin pah-pahan. Nah melarapan antuk punika para pengiring sampun meakeh skeet lima diri rauhing sane gumana dados pesungkem ring ikaluwarga. Sesampun ring tengah-tengahing wewatesan irika raris dane ngardi palemahan sane keanggen genah wewangunan Parhyangan manut ringwewilang sane lagi keardi, sejawa punika ikaluwarga sami kaicen raris pah-pahan merupa tanah sami melimang sukat tur kelunturin antuk pemargi sepula-pali punika sane keanggen sedana.

Tanah pah-pahan sane sami melimang sukat punika kesinanggeh tanah payahan desa, nenten pisan kekeginang ngadol lintang ring wewidangan Desa Ngis, kegin kekantahang nanging anut ring kebuatan yadnya, taler tan kekeginang ngelintang ringwewidangan Desa Ngis.

Risampun kesinanggeh wenten desa anut ring pekraman tanah punika meruntutan ring sahananing ayah-ayahan, lelan-lanan sane keanggen metigepang adat lan agama. Kasukertayang taler krama skeet lima punika pinaka arep ayah kalih kawertenang pesamuhan petemu wirasa sanunggil asasih panedenging Purnama matemu Kajeng. Nenten simpang taler ngardi genah sane kasinanggeh setra utawi sema pinaka sukseman saking urip ngantos mantuk kagenah ring ngardi.

Asapunika ketatwaning Desa Ngis sane mawiwit saking Alas Nges, mogi-mogi sangkaning sih Ida Sanghyang Prama Kawi jenek tur langgeng rauh kaungkur wekas.

SARGA I
ARAN LAN WEWIDANGAN DESA

Pawos 1

1. Desa Adat puniki mewasta Desa Adat NGis.
2. Jebag kekuwub wewidangan mewates nyatur :
 - a. Sisi Kangin Desa Adat Tenganan
 - b. Sisi Kelod Desa Adat Pekarangan
 - c. Sisi Kauh Desa Adat Selumbung
 - d. Sisi Kaler Desa Adat Macang
3. Desa Adat puniki kewangun antuk munjuk lungsuring saking seket lima krama ayahan desa,tur keremba antuk satak ulung dasa patpat krama ayahan sesabu tur kaepah dados kalih banjar adat miwah banjar dinas luire :
 - a. Banjar Kajanan
 - b. Banjar Kelodan

Pawos 2

1. Manut Trilingganing desa sekuwud wewidangan pinara tiga luire :
 - a. Utama Mandala tegak Kahyangan Desa
 - b. Madya Mandala mekadi pupulan karang paumahan lan telajakan desa.
 - c. Nista Mandala mekadi setra desa apelabahan.
2. Wates palemahan banjar patut kemanggehang antuk paruman desa.

Pawos 3

1. Banjar wenang ngardi Awig-awig muah pararem maka pamikukuhnyane.
2. Awig – awig banjar tan wenang lempas ring Awig-awig muah pasuara desa tur kelingga tanganin antuk Keliang Desa maka pamikukuh dumogi sida lumaksana.

SARGA II
PETITIS LAN PAMIKUKUH

Pawos 4

Desa Adat Ngis puniki ngemanggehang dasar :

- a. Pancasila
- b. Undang –Undang Dasar 1945
- c. Tri Hita Karana manut tata cara Agama Hindu

Pawos 5

Luir Petitis Desa Adat Ngis :

- a. Mikukuhin miwah ngerajegang Sangyang Agama
- b. Ngutamayang prawertine me-agama Hindu
- c. Ngerajegang sukertan desa saha pawongannya sekala niskala

SARGA III

SUKERTA TATA PAKRAMAN

Palet I

Indik Krama

Pawos 6

- 1. Sane kebaos Krama Desa inggih punika kulawarga sane me-agama Hindu ngamong ayahan desa wiadin banjar utawi sane sampun jumenek ring palemahan Desa Adat Ngis mewaneng tigang sasih tur sampun buluangkep.
- 2. Krama Pangele kulawarga sane manut wiwit (1) ring ajeng sinalih tunggil lanange utawi istrine seda.

Pawos 7

Krama Desa wenten poos luire :

- a. Krama Desa sane ngamong ayahan desa
- b. Krama Desa sane magenah ring dura desa
- c. Krama Tamii inggih punika krama sane mawiwit saking dura desa melarapan antuk ngerereh karya jumenek magenah ring wewidangan Desa Adat Ngis mewaneng tigang sasih.

Pawos 8

Ngawit dados Krama Desa wenten tigang poos luire :

- a. Mawit saking merabian sesampun nawur wala gara
- b. Mewates pawiwanan sesampun mewaneng tigang sasih
- c. Mawiwit jumenek magenah riantukan ngerereh pengupa jiwa sajeroning palemahan Desa Adat Ngis sesampun mewates tigang sasih tur sampun buluangkep

Pawos 9

Ayahan Krama Desa kepalih dados petang poos :

- a. Ayah Arep saking arep
- b. Ayah Pangele saking Krama Pangele manut wiguna
- c. Ayah Petajuh saking krama balu miwah kedandan waris manut aksara (a) lan (b) ring ajeng sane kantun alit – alit
- d. Ayah roban saking dandanan waris manut aksara a lan b miwah krama balu sane sampun mayusa limolas warsa tur sampun mungga deha utawi teruna saha soang-soang kapupulang dados sekehe manut wiguna.

Pawos 10

Tategenan Krama Desa kadi ring sor :

- a. Krama ngarep keni ayah-ayah miwah papeson mungkul
- b. Krama pangele ten keni ayah-ayah pepeson.
- c. Dandanan waris manut pawos 9 aksara c ring ajeng sane katinggalin yayah rena utawi ubuh durung munggah deha utawi teruna saha tan meduwe pangundul ayah-ayah miwah pepeson keluputin.
- d. Krama desa sane magenah ring dura desa sanunggil Aci Kasa keni :
 1. Urunan beras adasa kg.
 2. Pekaadmara atengah kg beras.
- e. Krama tamiu sanunggil Aci Kasa keni :
 1. Krama tamiu sane magenah jumenek keni urunan akutus kg beras.
 2. Krama tamiu sane ulah-ulih keni urunan petang kg beras.
- f. Sabinaning sekeha-sekeha manut adat wenten taler sakehe Teruna-Teruni kaiket antuk adat.
- g. Sekeha Gong, Gambang ngerempon sehanan lelanguan sajeroning upecara-upecara Dewa Yadnya, Buta Yadnya, Pitra Yadnya ring sajeroning kabuatan desa wiadin pakraman manut wiguna
- h. Kecaping aksara e, keluputin ayah-ayah, olih-olihan kepolihang

Pawos 11

Krama desa kasinanggeh tamiu sane me-agama Hindu menawi ngrauhin pakulawargan ring Desa Ngis arep wewarisan miwah ngaturang bakti ring Kahyangan Desa Adat Ngis sapemargin sang tamiu sane ngerauhin Desa Ngis nginutin pasukertan desa

Pawos 12

Swadarmening Krama siosing ayah-ayahan luire :

- a. Dreda atuang ring desa
- b. Tinut saturut ring sedaging awig-awig miwah pasuara-pasuara desa
- c. Tanmaren ngutsahayang desane mangdea mresidayang nyujuh petitis Desa Adat Ngis manut pawos 5.

Pawos 13

Petuas utawi olih-olihan Krama Desa luire :

- a. Polih pesayuban, ngemanggehang luir petitis tur kebaosin saha ketibakin pemutus sehanan wicara
- b. Nyarengin paruman desa saha wenang mastikayang pemutus.
- c. Kengin kadi ring sor puniki :
 1. Mapewangked ngeluputin ayah-ayah desa luire ngerebin, nandur, ngunggahang kesendi, meyadnya sekadi :
 - Pitra Yadnya Ngaben, mendem lan Ngeroras
 - Manusa Yadnya Nigang Sasihin, pawiwanan lan metatah
 - Dewa Yadnya Ngodalin, Ngenteg Linggih
 - Butha Yadnya mecaru sejenisnya amanca
 - Sejawining punika taler metepetin, keluasan miwah mejalaran wenten pikobet.
 2. Nyada ngurusang ayah-ayah utawi pepeson riantukan sampun wantah pengundul utawi nyeledinin sesampun mayusa nem dasa warsa wiadin pinunas ngeraga sangkaning sungkan-sungkanan manut pangalokika.
- d. Sang nyeledinin ayah-ayah wiadin nyuksukin ayahan kawenanggang risampun munggah deha utawi teruna tur sampun mayusa limolas warsa.

- e. Mopog ngentosin ayah-ayah saha pepeson antuk arta berana dwaning dados Preyogya Sang Amawarat, Cedangga,kalih sungkan-sungkangan manut panglokika Sangkepan Desa.

Pawos 14

Sang usan mekrama desa luire :

- a. Sangkaning megingsir genah ke dura desa tur sampun polih lokita saking Prajuru Desa
- b. Sangkaning seda
- c. Sangkaning nyada
- d. Sangkaning pinunas ngeraga manut panglokikan Sangkepan Desa

Palet 2

Indik Prajuru Desa

Pawos 15

1. Desa Ngis puniki kaenter antuk Prajuru Desa :
 - a. Kelihan Desa Adat utawi Pasek ngawedarang parindik
 - b. Kubayan pinaka pangenter Yadnya
 - c. Penyarikan pinaka Juru Surat
 - d. Pemangku
 - e. Kelihan Banjar sane ngeremba
 - f. Petengen pinaka Saya Arah
2. Banjar kaenter antuk Kelihan Banjar
3. Sehanan Kelihan patut :
 - a. Mawiwit saking Krama Ngarep
 - b. Wikan ngewacen kalih nyurat aksara latin miwah aksara bali
 - c. Kelihan Desa keadegang melarapan pemilihan,sapuniaka taler Kelihan Banjar
 - d. Prajuru keluputin ayah-ayah miwah pepeson, nanging olih-olihan pateh sekadi ayah arep
 - e. Krama sane kasudi dados Prajuru Desa Adat kabiseka ring sangkepan desa magenah ring Bale Agung

Pawos 16

1. Swadarmaning Prajuru luire :
 - a. Ngenterang sedaging awig-awig pasuara miwah sangkepan desa
 - b. Nuntun tur ngenterang Krama Desa ngupadi manut petitis
 - c. Nuntun saha nyaksinin tata cara muah sehananing kauripan mabuat ngilitang pasulur kulawargane
 - d. Maka duta desa majenge ring sapa sira ugi
 - e. Mawosin tur niwakang pamutus majeng ring wicara krama desane
2. Prade Prajuru mamurug kecapping awig-awig keni pamidanda nikel ring krama desane wiadin kengin keusanang manut sangkepan desa

Pawos 17

Petuas Prajuru Desa luire :

- a. Kaluputin ayah-ayah miwah pepeson

- b. Cenengan olih-olihan desa
- c. Olih-olihan siosan manut pararem

Pawos 18

1. Prajuru kagentosin riantukan :
 - a. Seda
 - b. Pinunas ngeraga sesampun kesetujuin antuk krama desa
 - c. Memurug awig-awig
2. Ngentosin utawi ngerariyanang Prajuru mangde ring sajeroning sangkepan desa

Palet 3

Indik Sangkepan

Pawos 19

1. Sangkepan ring Desa Ngis luire :
 - a. Sangkepan Krama Desa lan Sangkepan Pemangku nuju Purnama tan nemuning rahina Pasah
 - b. Sangkepan Krama Sesabu kawentenang ngesasih nemuning rahina Redite Umanis
 - c. Sangkepan Pemaksan nemuning rahina Anggara Kliwon utawi Anggara Kasih
 - d. Sangkepan Banjar kemargiang ngesasih nemuning rahina Buda Umanis sesampun puput sangkepan Sesabu
 - e. Sehanan sangkepan inucap ring ajeng tan kedadosang encak jantos sasihan
 - f. Sabinaning sangkepan inucap ring ajeng wenten malih sangkepan sekeha-sekeha manut wiguna soang-soangtan lempas ring petitis desa.
2. Sajeroning pastika panemaya sangkepan desa, banjar kalih sane siosan sekadi inucap ring ajeng taler kawentenang sangkepan Padgatakala manut wiguna soang-soang
3. Sehanan sangkepan patut sekadi munggah ring sor :
 - a. Tan maren mapinunas ring Begawan Penyarikan maka sarana widi widana cane
 - b. Krama ngarep prasida memargi risampun katedunin antuk Sang patut nitenin maduluran suaran kulkul saha mabusana nyelempot tur nyungklik keris.
 - c. Sabinaning krama ngarep prasida memargi risampun katedunin antuk sang patut nitenin meduluran suaran kulkul saha mabusana nyelempot tan kengin makta gegaman
 - d. Ngawit macak sep-sepan, kalih migung pekaryan muah penguntat macak patedunan
 - e. Pemutus kautsahayang melarapan antuk paras-paros, prada tan prasida suara sane makehan kasinanggeh pamutus.

Pawos 20

1. Pesangkepan Desa utawi Banar maosin saha ngerauhang indik :
 - a. Munjuk lungsuring pakraman lan ayah-ayahan
 - b. Sulur arta brana druwen desa
 - c. Rencana wewangunan sane pacang rauh
 - d. Sehanan wicara saha pamutusnia
2. Sehanan pasuara ring ajeng katitenin saha katiwakin pamutus Sangkepan Desa
3. Prade wenten Krama mawicara wenang wicarania keaturang ring Prajuru
4. Risampun wicara inucap kebaosin olih Prajuru, Prajuru niwakin pamutus, prada pamutus inucap tan katerima kengin wicarania keaturang ring Sang Amawarat
5. Prada pamutuse pateh ring sedaging pamutus Prajuru wenang krama inucap kedanda seket kg beras
6. Sehanan pamutus sangkepan desa tan dados lempasring sedaging awig-awig.

Pawos 2

1. Sangkepan Prajuru patut kawentenang nangken ngesasih rikalaning Purnama, sabinaning punika taler dados kawentenang sangkepan Padgatakala
2. Pesangkepan Prajuru Kawenangania ngerincikang tata upaya pemargin usaha muah ngerencana sakeluire
3. Pamutus sehanan rerancangan sane ngeninin tetegenan krama tan patut kemargiang yan tan kasetujuin antuk sangkepan desa
4. Pamutus sangkepan Prajuru sane mewiwit saking Sang Amawarat utawi ngonekang pecak perarem krama desa kasinanggeh Pasuara Desa.

Palet 4

Indik Kulkul

Pawos 22

1. Kulukul ring Desa Ngis luire :
 - a. Kulkul Pengelingsir utawi Pemangku
 - b. Kulkul Penyeneng utawi Pejenengan
 - c. Kulkul Perareman utawi Petedunan genah ring teben
 - d. Kulkul ring Banjar soang-soang
 - e. Kulkul Sekeha-sekeha manut wiguna
2. Tetepakan tabuh kulkul mesiosan manut wiguna utawi tetujon luire :
 - a. Kesedayan kaenter antuk banjar-banjar
 - b. Tengeran tedun ngayah utawi ngurunang sane sampun kearahang, kesuarayang ping telulas tangguran manut Tri Dasa Sakti
 - c. Tengeran ke Panca Baya luire :
 1. Kepnadungan, ketoya baya,kageni baya atuludan bulus
 2. Kekaninin kalih tuludan
 3. Kebaya pati utawi kepet patinia tigang tuludan bulus

Pawos 23

1. Kulkul desa tan wenang katepak yan tan polih pituduh sangkaning Prajuru kalih tan manut Pasuaran Desa
2. Sang nepak kulkul tan manut ring tetujon kekeninin pamidanda selae kg beras.
3. Rikala ketiben Pancabaya sang sapa sira ugi wenang nepak kulkul manut tetanger bayane tur sesampun nepak patut matur supeksa ring Prajuru Desa, yan tan jati wenten baya wenang kedanda satus kg beras.
4. Prada wenten pemargi ayah minekadi perareman, I Saya nenten nyuarayang kulkul patut kekeninin pamidanda seket kg beras.

Palet 5

Indik Druwen Desa

Pawos 25

Padruwen Desa Adat Ngis kadi ring sor :

- a. Kahyangan Tiga,inggih punika Pura Puseh, Pura Dalem, Pura Bale Agung, lan Pura Desa siosan minakadi Pura Sumuh,Pura Segara,Pura Biaung,Pura Pucaksari,Pura Ulun Setra,Pura Pempatan utawi Pesegehan, Pura Batu Madeg lan Pura Dalem Kangin.
- b. Karang Desa
- c. Setra apelebahan sane kaempon antuk Desa Ngis
- d. Piranti-piranti Desa luire :
 1. Penyimpenan druwen desa
 2. Bale banjar ring soang-soang banjar wewidangan Desa Ngis
- e. Lelanguan sane wenten ring Desa Adat Ngis luire :
 - 1.Gong, Gambang, Selonding kadruwe desa

Pailen-ilen wali ring Pura luire : Rejang,Pendet,Abuang,Cikcik,Daratan,Duren-duren ijo,Manda,Wewalen lanDaha Malom

Pawos 26

1. Prajuru Desa wenang ngetanggang padruwen desa, pelaba pura.
2. Pikolih desa keanggen prebia piodalan kalih wewangunan desa
3. Sehanan padruwen desa patut kailikitayang

Pawos 27

1. Pelaba pura dados kekaryanin antuk krama desa
2. Busana kalih payah-ayahan ring desa kesimpen ring pesimpenan desa

Pawos 28

1. Tan Kalugra ngadol miwah ngantahang sekancan padruwen desa, sejawaning kegunayang manut petitis tur polih pamutus sajeroning pararem desa
2. Sang ngamong karang desa tan kengin ngadol wiadin ngantahang riantukan karang inucap druwen desa, yan memurug karang inucap wenang kedaut olih desa
3. Sang sapa sira ugi pacang ngenahin karang desa mangda nunas surat panugrahan ring Prajuru tur pemarginé mapinunas mangda ring sangkepan Bale Agung, yan mamurug karang inucap wenang kedaut olih desa
4. Yan wenten krama ngenahin karang ngelalah karang siosan wenang kekeninin denda satus kg beras tur tanah sane kelahlah patut kewaliang
5. Krama sane pacang nyitak ring karang desa patut polih panugrahan saking Prajuru Desa, yan mamurug keni denda skeet kg beras tur citakan inucap kedaut olih desa
6. Tetegenan sang ngamong karang desa luire :
 - a. Metelah-telah manut wiguna
 - b. Jambal-Palagantung ngesasih
 - c. Tetakedan utawi Takedan manut giliran
 - d. Kelapa pengalo lelima ngewarsa

Palet 6

Indik Sukerta Pamitegep

Kaping 1

Karang, Tegal lan carik

Pawos 29

1. Sang ngenahin karang patut nyengker karang inucap antuk tembok wiadin pagehan, pinih ajeng sane marep kemarginé mangde kanten asri, yan mamurug keni denda selae kg beras
2. Penyengker sisi kaler miwah sisi kangin kekaryanin antuk sang madruwe karang reh mewasta gegaleng kauluan
3. Yan wenten karang kebebeng patut karang inucap polih margi
4. Prade panyengkere kasinanggeh ngelikadin yening pada arsa penyandinge kengin batese nganggen pinget kemaon tur kapikukuhin olih Prajuru Desa

Pawos 30

Tegal miwah carik patut magegaleng keteben pinegesnia bates sisi kauh muah sisi kelod patut kekaryanin tur kapiara antuk sang madruwe tegal utawi carik

Bates tegal utawi carik kengin antuk pagehan wiadin pracihna Pal saking kantor Agraria utawi KPT.

Pawos 31

1. Sinalih tunggil Krama Desa tan kengin :
 - a. Ngelahlah tegak sane kesinanggeh suci mekadi tegak Kahyangan wiadin setra
 - b. Ngelahlah tegal, karang, margi miwah sane siosan
 - c. Ngembakang sombah kepekarangan krama siosan
 - d. Ngentungang wangke wewalungan lan ubuh-ubuhan siosan ke pekarangan krama siosan, tegal krama siosan miwah margi lan rurung
 - e. Ngentungang wangke wewalungan ke pangkunge
2. Prade memurug ring ajeng :
 - a. Manut aksara a ring ajeng sejawaning keni upakara pemarisuda, patut ngewaliang sane kelahlah tur kadenda gung arta seket kg beras
 - b. Manut aksara b ring ajeng kadenda satus kg beras tur ngewaliang sane kelahlah
 - c. Manut aksara c ring ajeng patut nyampetin sombah inusap tur kadenda limang kg beras
 - d. Manut aksara d ring ajeng kadenda adasa kg beras
 - e. Yening wenten ngentungang wangke wewalungan ke pangkunge kadenda limang kg beras tur wangke wewalungan inucap patut ketanem olih sang ngentungang

Kaping 2

Kekayonan

1. Ngawit nandur tanam tuwuhan patut ameter tengah ngajeroang saking watese
2. Tan kalugra wit taru mentik sajeroning wates
3. Prade wenten taru mentik sekadi wiwit (2) kengin kewara antukpenyandinge, mangde taru inucap karebah kasaksinin antuk Prajuru Desa tur taru inucap kapinaro tiga, asiki katur ring prajuru sane maritetes, muah sane kekalih kaepah ring sang madruwe wates manut lokika
4. Prade wenten kasinanggeh mayanin,sang kejerihan patut atur supeksa ring Prajuru Desa mangdane taru inucap karebah, sanistania kapunggul
5. Prade wenten mayanin wewangunan, sane keni prabeya mecikang wewangunan inucap saha penyangaskara utawi pakeludan :
 - a. Sang madruwe wit taru sane kasinanggeh mayanin risampun polih keware
 - b. Sang ngerebah utawi munggul taru inucap
 - c. Taru inucap kapinara tiga, apah tigaan ke Desa, kalih pah tigaan kaepah ring sang madruwe wates manut lokika

Pawos 33

1. Yan wenten krama ngerebah taru pacang keanggen mapewangun utawi ngadol patut ngerereh pengelikita ring Prajuru Desa Adat
2. Prade kapurug :
 - a. Yang ngerebah taru kekeran desa utawi ngerebah taru ring tanah druwen desa kekeninin denda awit limolas kg beras, tur taru inucap kedaut olih desa
 - b. Prade taru tan kekeran desa kerebah, kedenda adasa kg beras sane awit
 - c. Rikala desa utawi banjar mapewangun wenang ngemargiang rerampagan luire :
 1. Desa sewidangan Desa Ngis
 2. Rikala banjar mapewangun, banjar nunas ring desa manut kabuatannyane

Kaping 3

Wewangunan

Pawos 34

Wewangunan patut :

- a. Tan nyayubin kapisaga

- b. Prade wenten ngayubin, risampun kesadokang ring Prajuru Desa tur wewangunan sane nyayubin patut keured senistania kekaryanang abangan
- c. Prade wewangunan ngelintang wates patut ngawentenang paigum tur kesadokang ring Prajuru, yan memurug riwekas kewara antuk Prajuru, wewangunan inucap wenang keured saha tan polih prebeya kepocolan

Kaping 4

Wewalungan

Pawos 35

1. Sehana krama desa sane mamiara wewalungan patut nitenin negul utawi ngelogorin mangda tan ngerusak karang utawi pakubongan krama siosan, yan memurug keni denda kalih kg beras tur ngewaliang sane kerusak manut pengarga
2. Prade ngerusak tegak suci sejaba keni pamidanda manit wiwit (1) mawewehe upakara penyangaskara eka sata
3. Prade nabab wewalungan, sang nabab patut pramangkin atur supeksa ring Prajuru Desa tan kasepan ring arahina awengi saha wewalungan inucap kapiara kadi patute kalih sang madruwe wewalungan patut nebas prabeya pangingunia
4. Prajuru sesampun polih atur supeksa patut ring gelis maosin

Pawos 36

1. Tan kelugra ngangon miwah negul wewalungan ring :
 - a. Palemahan tegak Kahyangan utawi Pemerajan
 - b. Pundukan miwah pagehan krama siosan kalih ring margi-margi sewidangan desa
2. Prade memurug sekadi inucap ring ajeng keni denda limang kg beras

Kaping 5

Indik Baya

Pawos 37

Yan wenten krama desa ketiben arta baya luir ipun kemalingan patut ring gelis atur supeksa ring sang Amawarat.

Kaping 6

Indik Penyanggeran Banjar

Pawos 38

1. Wewidangan Desa Adat Ngis kesanggra antuk kalih banjar adat luire :
 - a. Banjar Kajanan
 - b. Banjar Kelodan
2. Rikala ngewangun yadnya suka duka kengin nunas penyanggeran banjar
3. Penyanggeran banjar sane kemargiang manut dresta miwah perarem

Kaping 7

Indik sekeha Teruna-Teruni

Pawos 39

1. Sekeha Teruna-Teruni sane ngamong ayahan desa pekraman manut dudonan
2. Sekeha Teruna-Teruni kewangunang manut yusa ring swadarmania

3. Sekeha Teruna-Teruni kawenangania sewaka widia sastra ngawerdhang kauripania riwekas
4. Prajuru kemanggala mangde nitenin ring sajeroning darmaning yuana.
5. Siosan ring sekeha Teruna-teruni Prajuru ngayomin sinoman Desa pekraman mamerihang jagatdhita

SARGA IV

SUKERTA TATA AGAMA

Palet 1

Indik Parhyangan

Pawos 40

1. Sane kasinanggeh Kahyangan Desa inggih punika :
 - a. Tri Kahyangan
 - b. Dang Kahyangan
 - c. Sad Kahyangan
2. Kahyangan sane munggah ring wiwit (1) aksara a lan b ring ajeng prabeya pengaci miwah pamiarania keurunin antuk Krama Desa Adat Ngis

Pawos 41

1. Sane tan dados ngeranjing ke Pura luire :
 - a. Sane kecuntakan utawi kesebelan kesedayan
 - b. Sang sebel raga, anak istri madruwe oka sedurung asasih pitung rahina, nganten durung mewidi widana, ngeraja swala mewaneng petang rahina
 - c. Anak istri bobot karuron, asasih pitung rahina
2. Yan memurug keni pamidanda upakara pemarisuda Pura tur kedanda kalih kg beras

Pawos 42

1. Ring sajeroning Pura tan dados :
 - a. Yan tan mapengangge adat
 - b. Mebacin
 - c. Mewarih
 - d. Mejejuden
 - e. Memunyah
 - f. Memisuh
 - g. Mesanggama
 - h. Ngambahang rambut utawi mesuri
 - i. Mesalin pengangge
 - j. Mebaos bangras sane ngawetuang iyeg
 - k. Munggah ring palinggih lan panyengker pura yening tan polih panugerahan saking Prajuru Desa utawi Pemangku
2. Yan memurug keni pamidanda kalih kg beras tur patut ngupakara pemarisuda pura inucap, sejaba sane mungguh ring aksara h miwah i

Pawos 43

Ring Pura Puseh,Bale Agung miwah Pura Dalem sane kesinanggeh Tri Kahyangan miwah Pura-pura siosan manut Pale I indik Parahyangan Pawos 40 patut kawentenang Pemangku

Pawos 44

Ngadegang Pemangku patut nganutin dudonan sekadi ring sor puniki :

- a. Mewilang saking turunan

- b. Nunas pewuwus Widhi utawi nyanjan
- c. Kasudi olih Krama Desa Adat Ngis

Pawos 45

Sejaba punika kengin taler ngawentenang penyada utawi wakil Pemangku manut kabuatan

Pawos 46

Prebeya upakara Adiksa Widhi utawi mewinten Pemangku Kahyangan –kahyangan inucap manut Pawos 45 keurunin antuk Krama Desa Adat Ngis

Pawos 47

Sinalih tunggil Pemangku-pemangku ring kahyangan kapiambeng, indik pemargin pengaci dados kemargiang antuk Pemangku sane tan kapiambeng minakadi :

- a. Penyada utawi wakil Pemangku
- b. Pemangku sane kemanggeh sumaih ring Pemangku Tri Kahyangan
- c. Pemangku-pemangku Kahyangan sane siosan

Pawos 48

Sane tan dados keadegang Pemangku luir ipun :

- a. Ceda angga
- b. Saki tile
- c. Tan wikan ring sastra Bali wiadin latin

Pawos 49

Pemangku keusanang prade ten ngemanggehang swadarmuning Pemangku saha keiwangania kecihnayang antuk pemutus manut perarem

Pawos 50

Rerahanan-rerahanan sane katah kemargiang inggih punika :

- a. Kajeng Kliwon
- b. Purnama wiadin Tilem
- c. Purnamaning Kasa ngaturang peaci ring Pura Puseh
- d. Tilem Kasa kawentenang Pesegehan ring Perempatan Desa utawi Pura Segeha sane kewastanin Nabuhin
- e. Sasih kenem kemargiang peaci Nanggluk Merana sane magenah ring sajeroning :
 - 1. Pempatan kaler
 - 2. Pempatan kelod
 - 3. Pempatan kangin
 - 4. Pempatan kauh

Upakara kecapping aksara e puniki kewastanin Upakara Ngejaga

- f. Prewanining Tilem Kepitu kawentenang Upakara Ciwa Latri
- g. Tilem Kepitu Upacara Pecaruan ring natar Bale Agung ngangge pecaruan banteng, bawi utawi banteng, luir asu bang bungkem
- h. Purnamaning Sasih Kaulu ngawentenang peaci ring sajeroning pemedal karang desa sane kewastanin Aci Gedebong
- i. Tilem Kesanga kemargiang pecaruan Tawur Kesanga antuk banjar, sejaba Tabu Gentuh, luir ipun :
 - 1. Metabu Gentuh ring desa patut kawentenang manut dresta
 - 2. Ring pemedal soang-soang pekarangan wiadin pakubonan mangde nancebang sanggah cucuk tur medaging aci-aci manut dresta
 - 3. Benjangne krama desa adat Ngis ngemargiang Penyepian minakadi :
 - a. Amati Geni, tan kengin meapi-api sejawaning :
 - 1. Sang madruwe rare durung tigang sasih ring genah rare inucap

2. Sang matepetin ring genah sang sungkan
3. Sang madruwe kasedayan ring genah layone lan sapenunggilania
- b. Amati Karya, tan wenang nyambut karya
- c. Amati Lelungan, tan kengin malelungayan sejawaning tilik Prajuru Desa saha polih uwak-uwakan antuk ilikita pastika
- d. Amati Lelangan, tan kengin masuara, maoneng-onengan utawi mapelalianan
- e. Yan mamarug keni danda kalih kg beras
- j. Tilem Kedasa kewentenang Pecaruan ring Perempatan Desa antuk banteng selem tur karuntutin Caru Ayam Manca kalih Krama Seket Lima ngawentenang pasegehan sane kewastanin Meperani
- k. Tilem Diesta kemargiang peaci ring Pura Dalem nganggen pecaruan luire :
 1. Pecaruan banteng, bawi luir a caru ayam manca, yening pemargin peaci Daleme ageng
 2. Pecaruan ayam manca yening peaci Daleme alit
- l. Buda Wage Kulawu kemargiang upacara peaci ring Pura Biaung luir Pura Pucak Sari, lan Paibon-paibon nanging wenten pagilinhnia :
 1. Yening peaci ring Pura Biaung ageng, ring Paibon-paibon alit.
 2. Yening peaci ring Pura Biaung kasinanggeh alit, ring Paibon-paibon kengin kemargiang peace ageng
- m. Tumpek Landep kemargiang peaci ring Pura Puseh

Pawos 51

1. Ring sajeroning pemargin peaci-aci ring kahyangan – kahyangan inucap ring ajeng, Krama Desa Adat Ngis kepatutang ngaturang sarwa saji utawi wangi-wangian sesuen upacara kemargiang.
2. Kelanturin antuk wewalen luir ipun :
 - a. Kekidungan warga sari
 - b. Tetabuhan gong utawi gambang
 - c. Suaran kulkul ageng
 - d. Rejang, Pendet utawi Abuang
3. Yening sampun puput indik peacine Ida Batara-Batari katuran mesineb tur Krama Desa Adat Ngis mangda prasida rauh sumuyud ngaturang pangubakti

Pawos 52

Ring rerahinan agung luir ipun :

- a. Sugian
- b. Galungan
- c. Kuningan
- d. Saraswati
- e. Buda Kliwon Pagerwesi
- f. Muah rerahinan – rerahinan sane siosan, patut Krama Desa Adat Ngis nyungkemin tur ngaturang aci- aci ring Kahyangan Desa.

Pawos 53

Ngawit Anggara Wage Galungan patut Krama Desa Adat Ngis ngadegang penjor mesanggah cucuk puang-puang pekarangan luir pakubongan sesuonyane roras rahina rauh Redite Umanis Langkir

Pawos 54

Ritatkala Buda Wage Kelawu Prayogan Ida Batara Rambut Sedana, Krama Desa Adat Ngis ngaturang piodalan – piodalan ring Penataran-penataran.

Pawos 55

Ritatkala Saniscara Kliwon Wuku Wayang, Krama Desa Adat Ngis ngaturang aci – aci ring Pura Sumuh sane kasinanggeh Ngamel Sarwa Mesuara

Pawos 56

Saniscara Kliwon wuku Landep, Krama Desa Adat Ngis ngaturang aci-acih ring sarwa keris kalih sane siosan sane kasinanggeh senjata

Pawos 57

Saniscara Umanis Wuku Watugunung, Krama Desa Adat Ngis ngewentenang penyanggra saha meduluran aci-acih katur ring Sang Hyang Aji Saraswati meruntutan antuk sambang semadi ring Pura Puseh

Palet 2

Indik Resi Yadnya

Pawos 58

Sang madruwe yadnya patut ngaturang punia ring sang sane muput yadnya

Pawos 59

Prajuru patut ngawas tur ngayomin, mialangin yan wenten pemargin ngelantudin pemargin yadnyane

Pawos 60

1. Krama Desa Adat Ngis patut ngawas,nitenin katuntun antuk Prajuru mangda sehanan yadnyane sane kawentenang keicen pemuput oleh Sang Sulinggih utawi Pemangku manut dresta
2. Prajuru patut nuntun saha ngemanggala Krama Desa Adat Ngis ngawas, nitienin sapemargin wikune ring wewidangnia, pamekas mikukuhin kasucion linggih ida
3. Ngaturin sang muput dana punia manut agung-alit yadnyane

Palet 3

Indik Pitra Yadnya

Pawos 61

1. Pemargin Pitra Yadnya madudonan manut sekadi ring sor :
 - a. Pengupakaraan sang layon :
 - Mendem utawi ngeseng maka cihna pakinsan ring ibu pertiwi utawi ring geni
 - Atiwa-atiwa lantur keabenang saha kedadosang ring sang ketus untu, prade durung ketus untu ngawit saking yusa tigang sasih patut keabenang ngelungah
2. Sane kebaos pengembak Ngaben, ngawit saking Karo lan Katiga

Pawos 62

Atiwa-atiwa utawi pengabeanen wenten tigang poos :

- a. Nyawa Resi
- b. Nyuasta Geni
- c. Sawa Preteka kemargiang antuk ngagah utawi mereteka sawa bah bangun

Pawos 63

Swadarmaning lan tategenan prade wenten sinalih tunggil krama desa kelayuan utawi kesedayan:

- a. Sang kesedayan patut:

1. Nyadokang ring Prajuru Desa Adat Ngis
2. Nyadokang ring krama banjarnia,prade kependem utawi keabenang
- b. Yan sawane jantos makeletan tan kengin langkungan ring petang rahina, sejawaning picukuh lagi Ngaben utawi munggah Tumpang Salu

Pawos 64

1. Indik medem sawa ritatkala aci utawi rahina nyejer, rahina larangan desa nenten kengin mendem tur sawane patut kegenahang beten
2. Rahina sane kasinanggeh larangan mendem sawa luire :
 - a. Purnama
 - b. Tilem
 - c. Semut Sedulur
 - d. Kala Gotongan
3. Yan wenten aci ring Pura-pura wewidangan Desa Adat Ngis sejaba ring Kahyangan Desa dados kemargiang pengabeanan utawi ngeseng sawa sajawaning larangan desa
4. Tan wenang ngaben utawi ngeseng sawa ngawit saking dasa rahina sadurung nyambut aci ring Kahyangan Desa kantos rahina penyimpenan Ida Batara
5. Yan mendem kedadosang sesampun polih panugerahan saking Prajuru Desa Adat
6. Yan wenten mamurug wiwit (1),(2),(3),(4) lan wiwit (5) ring ajeng keni upakara pemarisuda Pura tur danda satus kg beras.

Pawos 65

1. Yan wenten anak seda sangkaning salah utawi ngulah pati kapenggawan lan sapenunggilania kengin kebakta maktuk tur kapreteka kadi patute risampun kamenggala antuk upacara banten penebusan lan pengulap
2. Yan wenten anak istri seda ngadut manik wenang kageseng utawi kapendem nanging garbania katetehin antuk batu.
3. Yan wenten jatma seda sajeroning pekarangan, tegalan, carik anak siosan lan sapenunggilania patut sang madruwe sawane merascita genah inucap
4. Yan wenten jatma seda sangkaningmadruwe penyakit ngelahlah utawi menular patut ring gelis kekinsanang pendem kantos rahina dados mendem,yan mamurug kedanda seket kg beras.

Pawos 66

1. Mungguhing kacuntakan, sang madruwe kasedayan kacuntakan sia rahina.
2. Tan kenang kacuntakan Pemangku Kahyangan Tiga sane nenten sebel karang

Pawos 67

1. Sawa-sawa sane kaebet ring setra wenang keupakara Sawa Prateka ring Penanggun Desa Adat Ngis sane keloktah sadelod jebag
2. Yening tulang sawa kaebet tur kageseng, indik Upakara Nyawa Keresian pateh kadi Nyawa Prateka magenah ring penanggun Desa manut wiwit (1)
3. Yening Sawa Tirta utawi Ngerecadana kedadosang ngambil genah ring sajeroning Pekarangan utawi Pakubonan

Palet 4

Indik Bhuta Yadnya

Pawos 68

1. Bhuta Yadnya inggih punika pabeyakalan ring Ibu Pertiwi miwah Kahyangan ring Sarwa Prani muah ring Sarwa Bebhutan
2. Upacara-upacara pabeyakalan ring ibu pertiwi miwah ring Kahyangan Desa lan ring Bebhutan kewastanan mecaru
3. Pecaruan inucap Utama, Madya lan Nista manut wigunania kadi ring sor :
 - a. Ekasata
 - b. Pancasata

- c. Resigana
- d. Pancakelud
- e. Pancasanak
- f. Balik Sumpah
- g. Tabugentuh

Palet 5

Indik Manusa Yadnya

Pawos 69

1. Sang pacang mapodgala madwijati,sejaba nunas panugerahan ring Sang Wenang patut atur supeksa ring Prajuru Desa
2. Prajuru inucap sareng nitenin, nureksa mangdasulur miwah pemargin jati-jati manut ring kecaping Agama
3. Sesampun puput Padwijatinia Prajuru Desa Adat Ngis patut digelis ngentosin pesengan Sang madwijati ring sehanan ilikita antuk biseka kawikon manut panugerahan Nabene saha kasiarang ring Paruman Desa Adat Ngis

SARGA V

SUKERTA TATA PAWONGAN

Palet 1

Indik Perabian

Pawos 70

1. Perabian inggih punika patemoning purusa lawan pradana melarapan panunggalan kayun suka cita kadulurin upasaksi sekala niskala.
2. Perabian inucap nganutin awig-awig Desa Adat Ngis lan Pasukertan Sang Amawarat tur mangdene prasida kelaksanayang patut kesaksinin oleh Prajuru.
3. Pemargin perabian luire :
 - a. Pepadikan, maduluran antuk suka cita sangkaning paigum pikayun kaluwarga sang kalih.
 - b. Merangkat, melarapan antuk suka cita lanang istri,wates pejatine arahina ring awengi, yan mamurug ring parindik puniki kadanda seket kg beras
 - c. Akeh Pejatine paling alit kalih diri patut mabusana adat saha nyelet keris tur makta bebek, yan mamurug pejati keni danda kalih kg beras
 - d. Mapejati patut ring Reramane twi, yan tan wenten patut kerauhang ring waris kepurusa tur keuningayang ring Sang Amawarat
 - e. Prade pemargin rangkate kesumangsayain Sang madruwe wirange dados ngemargiang penegdeg,nanging mangda kesarengin oleh Sang Amawarat
 - f. Ring sajeroning ngemargiang penegdeg tan kawenangang makta saluiring senjata
 - g. Yan pemargin rangkate mecihna tan sangkaning kerana suka, lanange patut keni danda satus kg beras tur pemargin rangkate kewangdeang
 - h. Sedurung makta pengenduh wiadin jauman Sang ngambil patut ngemargiang duta pengendek malih ring Sang madruwe oka sane keambil, riantukan ngantenang pemargin Pengenduh wiadin Jejauman, medaging jinah siu pitung atus rupiah
 - i. Yan Sang madruwe oka sane keambil ngenikayang ring duta lagi nerima pangenduh wiadin Jejauman rarisi ring pemargin nenten kayun nerima patut Sang madruew oka sane keambil punika kedanda seket kg beras
 - j. Pengenduh sareng jejauman kemargiang rahina utawi sore kautsahayang mangde nenten kantos wengi
 - k. Yan pangenduh sareng jejauman sampun katerima rarisi upacara serah kalanturang meserah tipat bantal, banten pejati tur sang istrinunas mapamit ring Sanggah Kemulan Istrine dados kesarengin wiadin kesaksinin ring Sang ngambil sareng Prajuru Adat

miwah sang ngerangkatang sesampun keterag ngayah ke desa, Sang merabian inucap patut ngaturang walagara ke desa petang kg beras.

1. Yan wenten ngerangkatang ke Dura Desa patut nguningayang ring Prajuru Desa Adat,Kelihan Banjar Dinas,miwah ring Perbekel yan memurug keni denda limang kg beras.
- 2.Yan wenten pengetut saking kaluwarga sang kerangkatang patut atur supeksa ring Prajuru Desa Adat, Kelihan Banjar Dinas miwah perbekel.
4. Perabian sane tan kepatutang kadi ring sor :
 - a. Tan dados ngerangkatang Tumin dia nyama
 - b. Pianak temen,Pianak dia nyama, Berawa di nyama, Semeton sodet, Semeton sios meme,Semeton dia cambra, Pianak peperasan,Pianak kualon, lan warang, yan mamurug patut kepala sing tur kedanda satus kg beras saha ngarerebuin Desa Pekraman
 - c. Yan wenten anak lanang mecihna angrabini wang alaki rabi,Sang angrabini inucap kedanda satakg beras tur wiring anake istri patut wicarania ring Sang Amawarat, yan mamurug kedanda satus kg beras
 - d. Yan wenten anak lanang ngerangkatang anak istri sane kantun merabian kedanda tigang atus kg beras tur wiring anake istri patut ngaturang wicarania ring Sang Amawarat, yan mamurug kedanda satus kg beras
 - e. Yan wenten anak mecihna memitra ngalang sekadi anak mekurenan jantos tigang sasih patut Prajuru Desa maosin tur ngicen pemutus :
 1. Yan sang kalih sami-sami nenten madruwe rabi patut kerangkatang yan tan prasida wicarania katur ring Sang Amawarat, prade pamutuse patah Sang lanang kedanda seket kg beras
 2. Yan sang lanang sampun madruwe rabi patut pemargin memitra ngalange kepala sing tur rabin lanange utawi wiring anake istri patut ngaturang wicarania ring Sang Amawarat, yan mamurug kedanda satus kg beras

Pawos 71

1. Perabian sane kemanggehang patut manut Adat Desa Ngis, indik pawidiwidanaan kapuputang antuk Sulinggih utawi Pemangku
2. Prajuru sane kasinanggeh saksi manut Pawos 70 wiwit (2) ring ajeng inggih punika, Prajuru Desa Adat, Kelihan Banjar Dinas muah Perbekel
3. Sang merabian ngawit tedun ngayah mekrama desa sejaba sampun mewidi widana lan naur walagara patut wenten Akta Perabian

Pawos 72

Piteges perabian patut nganutin Undang-undang Nomor 1 Tahun 1974 tentang Perkawinan, yan wenten mamurug wicarania katur ring Sang Amawarat

Palet 2

Indik Palas Merabian

Pawos 73

1. Perabian prasida wusan melarapan antuk palas utawi kepademan
2. Wusan mapakurenan riantukan sinalih tunggil seda mapiteges balu
3. Palas merabian wenten sangkaning pada lila utawi mawiwit wicara macihna tan tumus suka – citaning penunggalan idep Sang alaki rabi mapiteges Nyapian
4. Tata cara palas merabian:
 - a. Yan wenten krama desa mapikayun lagi palas merabian patut atur supeksa ring Prajuru Desa, oilih Prajuru desa wicarania kebaosin tur kaicen pemutus ring Sangkepan Desa
 - b. Yan pamutus Prajuru Desa tan keterima, wicarania dados kelanturang ring Sang Amawarat.

- c. Prade pamutuse patuh kadi sane kaicen Prajuru Desane wenang kedanda seket kg beras.

Pawos 74

1. Prade riwekas Sang palas merabian mecihna adung malih patut ngelaksanayang Upacara Pawiwanan malih manut deresta sesampun polih panugerahan saking Sang Amawarat
2. Keni penuku kesisipan seket kg beras

Pawos 75

1. Soang – soang balu manut pawongan kabinayang dados :
 - a. Balu Luh wit sentana rajeg
 - b. Balu Luh boyo sentana rajeg
2. Swadarmening balu inucap patut :
 - a. Ngawisesa waris, pagunakaya, tan kewasa ngadol, ngadeang, makidihang sajeroning durung polih pamutus paigum saking Sang patut ngewaris
 - b. Yening balu inucap ngangkat sentana kedadosang yan sadurungnia sinalih tunggil seda sampun wenten pidabdab tur kasetujuin antuk kaluwarga kapurusa
 - c. Manut sekadi pemargin perabian ring Desa Adat Ngis kengin ngambil baluan semeton minakadi ipah cerikan utawi ipah kelihan

Pawos 76

1. Balu Luh tan pageh luire :
 - a. Metilar saking jero utawi pakubonan tan pesadok sajeroning tigang sasih
 - b. Lempas ring swadarmenia Balu, tan sida ngentosin parisolah majeng ring kaluwarga pecak rabine utawi kaluwarga kepurusa rabine
2. Prade balu inucap pageh nganutin swadarmenia ketundung antuk sentanania utawi kaluwarga kepurusa, balu inucap patut polih pah-pahan Pagunakayaan, sane lanang polih ategen, sane istri polih asuhun

Palet 3

Indik Sentana

Pawos 77

1. Mungguing Sentana wenten kalih soroh luire :
 - a. Prati Sentana wiadin sentana rajeg
 - b. Sentana Paperasan
2. Yan wenten perabian tan prasida ngawetuung sentana kengin meras sentana sakawanten mangde adung dumun ring kaluwarga pasemetonan dadiane

Pawos 78

1. Sang mapikayun meras sentana patut atur supeksa ring Prajuru Desa, senistania asasih sedurung sedurung kemargiang Upacara Pemerasan
2. Prajuru Desa kalih Kelihan Banjar patut nyiarang ring wewidangan Desa Adat Ngis
3. Prajuru Desa digelis maosin tur ngicenin pamutus mungguing dados tan pemerasan inucap kemargiang

Pawos 79

1. Pamerasan sane kasinanggeh patut ring Desa Adat Ngis risampun wenten :
 - a. Upacara mawidi-widana Pamerasan
 - b. Kesaksinin antuk Prajuru Desa, Kelihan Banjar tur kesiariang ring Paruman Desa
 - c. Polih ilikita saking Pengadilan Negeri
2. Sane patut keperas anggen sentana kadi ring sor :
 - a. Jatma me-agama Hindu
 - b. Papernahan saking kapurusa sang meras
 - c. Yan tan wenten kengin saking wadon, prade tan wenten wawu kedadosang sekitar karep

Palet 4

Indik Warisan

Pawos 80

1. Warisan inggih punika wewarisan utawi tetamian arta-berana, utang-piutang, ayah-ayahane sekala niskala saking kaluwargania arep ring keturunania
2. Sane kasinanggeh warisan luire :
 - a. Druwe tengah, Karang paumahan, Pemerajan miwah Pura Sesuhunan
 - b. Gunakaya, Tetadtadan, Jiwadana, lan utang-piutang

Pawos 81

1. Waris luire :
 - a. Prati sentana kepurusa utawi sentana rajeg
 - b. Sentana Paperasan
2. Prade tan wenten waris manut wiwit (1) sane dados waris luire :
 - a. Turunan kepurusa kepernah ngunggahangmekadi rerama dia misan, rerama dia mindon, kalih selanturnia ngunggahang
 - b. Turunan kepurusa kepernah kesampingmekadi keponakan, keponakan dia mindon miwah selanturnia nedunang
3. Yan putung utawi camput tan madruwe paperasan kewaris antuk Dadia, yan tan madruwe Dadia patut kaserah ke Desa Adat.

Pawos 82

1. Pah-pahan waris manut ring sor :
 - a. Risampun kelaksanayang Pengabeanan lan utang – piutang waris buntas
 - b. Para waris polih pah-pahan pada sane merupa pagunakaya, sejawaning Karang Paumahan Desa sane keamong antuk waris kang kesinanggeh Krama Desa Ngarep
 - c. Sinalih tunggil waris ring ajeng tan polih pah-pahan yaning matilar saking Agama Hindu
 - d. Pewaris dados ngedumang Padruweania ring sajeroning kantun urip :
 1. Jiwadana tetadtadan utawi bekal ring pianak sane kesah mapeumahan utawi makurenan
 2. Ngedumang pangupa jiwa
 3. Ngedumang tetegenan wiadin guna raksas, pahan waris padgata kantos pedum jumenek arep ring waris
 - e. Pidabdab waris Karang Desa kepatut sane ngewaris sentana sane kapitetes tur kepatutang ring Prajuru Desa Adat
 - f. Karang desa sane kasuungin utawi tan kagenahin mawaneg awarsa antuk sang ngewaris kedaut oih Desa

Pawos 83

1. Prade wenten sekadi ring ajeng Prajuru Desa nikabang ring Krama Desa sane mapinunas kalih wiyakti nenten madruwe genah panureksa Prajuru Desa
2. Yan tan keayahang sesampun kapaica mawaneng tigang sasih utawi tan kapidabdabang mewaneng awarsa, karang inucap wenang kedaut utawi kejabut oih desa
3. Krama desa sane magenah ring dura desa kedadosang nunas karang prade kantun wenten genah manut pangelokika Prajuru Desa.
4. Karang sane kasinanggeh sampun nganutin uger-uger kagenahin sanistania mangde wenten :
 - a. Puwaregan utawi Paon
 - b. Sanggah Kemulan
5. Karang telajakan tan kedadosang keosa-osa ring sang madruwe telajakane sedurung wenten paras-paros, prade kepurug wenang kebaosin oih Prajuru Desa tur kekenin danda adasa kg beras saha ngewaliang telajakan sane keosa.
6. Yan wenten ngeranjingin utawi ngarangin wawu medaging tanam tuwuh patut sang ngeranjingan punika naur atuku pati manut pemargine

SARGA VI
WICARA LAN PAMIDANDA

Palet 1

Indik Wicara

Pawos 84

1. Sane patut maosin miwah mutusang wicara ring Desa Adat Ngis inggih punika Prajuru Desa Adat Ngis Sang kasinanggeh Pangerta Desa Adat.
2. Ritatkala wenten wicara rarisi keputus ring Prajuru Desa Adat, yan pamutus punika tan mantuk ring pikayun Sang mawicarariantukan pamutus wicara saking Kerta Desa Adat, dados ngaturang wicarania ring Sang Amawarat mewaneng asasih saking rahina pamutus wicara Kerta Desa inucap, yan mamurug keni denda seket kg beras.
3. Sakeluiring wicara sane mawiwit saking corah muah kang memurug sedaging Awig-awig yadiastu merupa wicara inggihan putusing Krama Desa Adat utawi Banjar manut wiwit (1) ugi digelis kebaosin antuk Prajuru Desa Adat tan malih nyantos piuning Sang melaksana corah muah Sangmamurug pasuara
4. Sajawaning indik wicara manut wiwit (3) Kang Pangerta sukertaning Desa Adat patut nyantosang pesadok utawi pinunas Sang mapisarat kandugi nunasang mangde paindikan kawicara ring Sangkepan Prajuru Desa Adat
5. Saluiring panepas saking Prajuru Desa Adat mangdene napak ring Awig-awig makadi Pasukertan Desa
6. Dasar pamutus wicara mangda ugi katunasang pikukuh saking perarem antuk lokikaning wicara melarapan :
 - a. Ilikita, surat-surat sane sujati
 - b. Saksi, sane manut kasinanggeh saksi, sane tan wenang keanggen saksi inggih punika : Semeton, oka, rabi, rerama, yayah, ibu, misan utawi mindon ke purusa
 - c. Bukti, merupa sane keni keagem

Palet 2

Indik Pamidanda

Pawos 85

1. Prajuru Desa Adat wenang niwakang pamidanda ring Krama Desa Adat Ngis sane memurug Awig-awig muah pasukertan desa
2. Pawos-pawos wiadin pepaletan pamidanda luire :
 - a. Kang sisip katiwakin gung arta
 - b. Penebus kesisipan antuk ayahan
 - c. Keni pengupacara antuk bebanten
 - d. Kejabutin muah kegurahin utawi kelelang
 - e. Kerarisang sadurunge puput naur kaiwang-iwangan
 - f. Kaeladang
 - g. Nunas pangampun ring Krama Desa Adat
3. Jinah utawi arta berana pamidanda ika ring Krama Desa Adat utawi Banjar, Subak Abian kalih Sekeha-sekeha siosan manut kadi pasukertan soang-soang
4. Nanging yan kantos kebaosin ring Prajuru Desa Adat ugi naur Pakence a pahlimaan saking pamidanda
5. Dasar niwakang pamidanda ring sang ketiwakin sane kewatangang sisip sajeroning Krama Desa Adat Ngis kandugi mangda manut ring sedaging Awig- Awig muah Pasukertan siosan.
6. Kesisipan Krama Desa sane patut keni pamidanda wenten kalih poos :
 - a. Mamurug awig-awig lan pasukerta
 - b. Melaksana tan patut

SARGA VII

NGUWAH NGUWUHIN AWIG –AWIG

Pawos 86

1. Nguwah-nguwuhin awig-awig Desa Adat puniki kelaksanayang antuk Paruman Desa
2. Paruman inucap mangda kedasarin antuk pinunas Krama Desa wiadin Prajuru Desa
3. Pamutus kadasarin antuk Perarem gilik-seguluk

Pawos 87

Paruman indik nguwah-nguwuhin Awig-awig sekadi ring ajeng kengin kamedalang antuk Prajuru Desa

SARGA VII

PEMUPUT

Pawos 88

1. Awig-awig puniki kewastanin Awig-awig Desa Adat Ngis
2. Awig-awig puniki kemargiang ngawit keraremin

Pawos 89

1. Sakaluiring sane wenten sedurungnia patut keanutang ring sedaging Awig-awig puniki
2. Sakaluiring sane durung kebaos ring sajeroning Awig-awig puniki patut kelaksanayang manut tata cara sane sampun ketah memargji kedulurin antuk perarem

Pawos 90

1. Awig-awig puniki keadegang antuk Sangkepan Krama Desa Adat Ngis, duk rahina Wrapsati Umanis, Wuku Sinta, Tanggal ping 15, Sasih Kanem, Rah II, Tenggek 10, Icaka Warsa 1910
2. Prajuru Desa Adat Ngis sane ngardi Awig-awig puniki saha ngelingga tanganin

PRAJURU DESA ADAT NGIS

Jro Pasek,

I GEDE SUDIBIA

Jro Kebayan

I GEDE ANTARA DIPUTRA

Jro Penyarikan



I NENGAH SUKARDANA

Jro Parahyangan



I NENGAH SUKARIANA



